

ԳԼՈՒԽ Ա.

ԱՌԱՋԻՆ ՔԱՅԼԵՐ

Այսպէս ուրեմն, ընդ հուր և ընդ սուր անցներով՝ Հայաստանը կոչեց անկախ պետական դոյութեան: Յնծութեան աղաղակներով ու ծափերով չընդունեց նրա անկախութիւնը: Ընդհակառակը, շատերի համար նա նկատուեմ էր դժբախտութիւն: Հիւանդ երեխայ աշխարհ բերած մօր պէս, հայ ժողովուրդը գլուխ էր ծեծում սգաւոր և շշնջում ականջին. «Ինչ իմ ուրախութիւնն էս, դու՛ դժբախտութիւնը իմ...»

Այո՛, արցունքի ու ատապանքի ծովից ծնեց Հայաստանի անկախութիւնը: Ծառերը չէին հաւատում նրան. «անկախութիւն» ու «հանրապետութիւն» բառերը նրանք դնում էին չափերտի մէջ: Եւ այդպէս վարակու հիւճերը շատ էին գօրաւոր. իրօք որ, զարհուրելի էին պայմանները, և անկախութիւնը այդ պայմաններում հեղնանք էր թւում:

Փաստօրէն հայերի ձեռքը մնացել էր մի փոքրիկ հողաշերտ՝ հազիւ 12,000 քառ. կիլոմետր աղքատ ու կիսակործան մի երկիր՝ կծկւած ցամաք լեռների մէջ, աշխարհի խուլ անկիւնում, ծանրաբեռնւած դաղթականներով ու որբերով, չըջապատւած ատամ կրճատցնող թշնամիներով, անհաց, անդեղ, անօգնական: Սով ու հիւանդութիւն, աւար ու աւեր, լաց ու թշառութիւն, կոտորածի սարսափ: Իսկ միւս կողմ՝ էնվէրի բանակը յաղթական՝ համաթրքական երազներով տոգորւած, որ Հայաստանի մարմնի վրայով ձգտում էր դէպի Ասլշերոն ու Թուրքեստան:

Այսպէս էր դրութիւնը Հայաստանում, իսկ Թիֆլիսում տիրում էր կատարեալ շփոթ: Մայիս 26-ից յետոյ հայ-վրացական յարաբերութիւնները լարւել էին ծայր աստիճանի. վրացիները՝ արեցած իրենց անկախութեամբ ու դերմանական հովանաւորութեամբ՝ թշնամանքով էին նայում «ոռւանքի փեշից պոկ չեկող» հայերին, որոնք, իրենց հերթին վրացիներին համարում էին դաւադիր, դաւաճան, իրենց բարեկեցութիւնը հայ ժողովրդի դիակների վրա հաստատող, հայ ժողովրդի դոյութեան թշնամի...

Անկախութեան առաջին իսկ օրից, վրաց կառավարութիւնն ու հասարակական կարծիքը սկսեց դարմանք ու զայրոյթ արտայայտել, որ «գերիշխան Վրաստանի» հողի վրա շարունակում է մնալ օտար պետութեան մի իշխանութիւն: Հայերին ուղղւում էին աներկդէմի խօսքեր, թէ նրանց տեղը Թիֆլիսը չէ, այլ Երեւանը: Եւ այդ այն պահուն, երբ ամէն հաղորդակցութիւն Երեւանի հետ կտրւած էր և Լոսիի ու Փամբակի ձորերում թիւրքերն ու տեղական մահմետականները մաքրագործում էին հայկական գիւղերը: